

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

漢魏六朝百三家集

晉

第三十一冊

張司空
孫馮翊

V. 31

飛焚朱集

張茂先集

張茂先集題詞

張壯武博物君子晉室老臣彌縫暗
主虐后之間足稱補袞竟以猶豫族
誅橫尸前殿悲哉壯武初未知名作
鷦鷯賦以寄意感其不才善全有莊
周木鴈之思旣賦相風朽社亦躊躇

於在高戒險盛衰交心及陟台司不
祥數見中台星坼少子躔勸其遜位
猶戀弗忍決漢王京兆不念牛衣遂
沉牢獄然死以直諫誠重泰山壯武
豈忘牧羊時乎名位已極篤於守經
徒爲賈氏而死適資人口耳晁氏書

目云張司空集有詩一百二十哀詞
冊文二十一賦三今余所綴輯賦數
過之文不及全詩歌八十餘中間拂
舞白紵舞杯槃舞諸篇晉代無名氏
之作藏書家本亦有繫之張司空集
者然觀其壯健頓挫類非司空溫麗

之素餘詩平雅近代詩家深貶其博
學爲累豈所謂聽古樂而臥乎壯武
文章賦最蒼深文次之詩又次之大
抵去漢不遠猶存張蔡之遺詩藪論
詩晉以下若茂先勵志廣微補亡季
倫吟歎等曲尚有前代典刑余於司

空諸文亦云

婁東張溥題

張茂先集

題詞

三

晉張茂先集目錄

賦

鷦鷯賦
有序

歸田賦

相風賦
有序

永懷賦

感婚賦
有序

朽杜賦

壤材枕賦

豆羹賦

表

上壽食舉歌詩表

薦成公綏表

議

封禪議

晉文王謚議

廢黜武悼楊太后議

哀策

武帝哀策文

武元楊皇后策文

誄

章懷皇后誄

魏劉驃騎誄

列文先生鮑玄泰誄

箴

女史箴

大司農箴

尚書令箴

環材枕箴

銘

倚几銘

杖銘

書

與褚陶書

報雷煥書

暫西帖

問

甲乙問

序

博物志序

贊

博物志地理略贊

樂歌

晉四廟樂歌

王公上壽詩

食舉東西廂樂詩

其二

其三

其四

其五

其六

其七

其八

其九

其十

其十一

正旦大會行禮詩

其二

其三

其四

晉冬至初歲小會歌

晉宴會歌

晉中官所歌

晉宗親會歌

晉正德大豫舞歌

正德舞歌

大豫舞歌

晉凱歌

命將出征歌

勞還師歌

晉白紵舞歌詩

其二

其三

晉杯槃舞歌詩

拂舞歌二首

白鳩篇

獨漉篇

濟濟篇

詩

遊獵篇

遊俠篇

博陵王宮俠曲

其二

門有車馬客行

輕薄篇

壯士篇

蕭史曲

祖道從西應詔詩

祖道趙王應詔詩

太康六年三月三日後園會詩

其二

其三

其四

上巳篇

勵志詩

其二

其三

其四

其五

其六

其七

其八

其九

答何劭

其二

其三

情詩

其二

其三

其四

其五

感婚詩

雜詩

其二

其三

擬古

遊仙詩

其二

其三

贈摯仲洽詩

招隱

其二

荷詩

橘詩

附錄

本傳

晉張司空集卷全

晉 張華茂先 著

明 張溥西銘 閱

賦

鷦鷯賦

有序

鷦鷯小鳥也。生於蒿萊之間。長於藩籬之下。翔集尋常之內。而生生之理足矣。色淺體陋。不爲人用。形微處卑。物莫之害。繁滋族類。衆居匹遊。翩翩然有以自樂也。彼鷺鷥鷗鴻。孔雀翡翠。或

陵赤霄之際。或託絕垠之外。翰舉足以冲天。觜距足以自衛。然皆負矰嬰繳。羽毛入貢。何者。有用於人也。夫言有淺而可以託深。類有微而可以喻大。故賦之云爾。

何造化之多端兮。播羣形於萬類。惟鷦鷯之微禽兮。亦攝生而受氣。育翩翾之陋體兮。無玄黃以自貴。毛弗施於器用兮。肉不登乎俎味。鷹鷂過猶俄翼兮。尚何懼於罾罟。翳薈蒙龍。是焉遊集。飛不飄颻。翔不翕習。其居易容。其求易給。巢

林不過一枝。每食不過數粒。栖無所滯。遊無所
盤。匪陋荆棘。匪榮苙蘭。動翼而逸。投足而安。委
命順理。與物無患。伊茲禽之無知。今何處身之
似智。不懷寶以賈害。今不飾表以招累。靜守約
而不矜。動因循以簡易。任自然以爲資。無誘慕
於世僞。鵬鵠介其背距。鵠鷺軼於雲際。鷦鷯
於幽險。孔翠生於遐裔。彼晨鳧與歸鴈。又矯翼
而增逝。咸美羽而豐肌。故無臯而皆斃。徒銜蘆
以避繳。終爲戮於此世。蒼鷹鷂而受紕。鸚鵡慧

而入籠。屈猛志以服養。塊幽繫於九重。變音聲以順旨。思摧翮而爲庸。戀鍾岱之林塋。慕壠坻之高松。雖蒙幸於今日。未若疇昔之從容。海鳥爰居。避風而至。條枝巨雀。踰嶺自致。提挈萬里。飄飄逼畏。夫唯體大。妨物而形。壤足瑋也。陰陽陶蒸。萬品一區。巨細舛錯。衆繁類殊。鷦螟巢於蚊睫。大鵬彌乎天隅。將以上方不足。下比有餘。普天壤而遐觀。吾又安知其大小之所如。

歸田賦

隨陰陽之開闔，從時宜以卷舒。冬與處以城邑，
春遊放於田廬。歸邾鄆之舊里，託言靜以閑居。
育草木之藹蔚，因地勢之邱墟。豐荒果之林錯，
茂桑麻之紛敷。用天道以取資，行藥物以爲娛。
時逍遙於洛濱，聊相佯以縱意。目白沙與積礫，
玩衆卉之同異。揚素波以躍足，泝清瀾以蕩思。
低徊往留，棲遲淹滯。存神忽微，遊精域外。籍纖
草以爲茵，援垂陰以爲蓋。瞻高鳥之陵風，臨儵
魚於清瀨。眇萬物而遠觀，修自然之通會。以退

足於一壑故處否而忘泰

相風賦

有序

大史候部有相風在西城上而作者弗爲豈以其託處幽閑違衆特立無羽毛之飾而丹漆不爲之容乎

蓋在先聖道濟生人擬論天地錯綜明神在璿璣以齊七政象渾儀於陶鈞考古旁於六氣仰貞觀於三辰爰在保章世序其職辯風候方必立唯極循物致用器不假飾眇修幹之迢迢凌

高墉而莖植、玄鳥偏其增翥、晞雲霄而矯翼、嘉
創制之窮理、諒器淺而事深、步元氣於尋木、寄
先識於茲禽、旣在高而思危、又戒險而自箴、雖
廻易之無常、終守正而不淫、永格立以彌世、志
淹滯而愈新、超無返而特存、差偶景而爲鄰、

永懷賦

美淑人之妖豔、因盼睐而傾城、揚綽約之麗姿、
懷婉婉之柔情、超六列於往古、邁來今之清英、
旣惠余以至懽、又結我以同心、交恩好之款固、

接情愛之分深、誓中誠於皦日、要執契以斷金、
嗟夫天道、幽昧差錯、繆於參差、怨祿運之不遭、
雖義結而絕離、執纏綿之篤趣、守惠音以終始、
邀幸會於有期、冀容華之我俟、儻皇靈之垂仁、
長收懽於永已、

感婚賦

有賦

方今歲在己巳、將次四仲、婚姻者競赴良時、粲
麗之觀相繼於路、嫁娶之會不乏乎目、乃作感

婚賦

莖賦

彼婚姻之俗忌兮，惡當梁之在斯。逼來年之將
至今，迨星紀之未移。窈窕初茂，玉質始盛。容華
外豐，心神內正。接軫連騎，隱隱習習。充街塞里，
暉曜城邑。相麗姿之綽約兮，逢髣髴以感心。怨
佳人之幽翳兮，恨檢防之高深。

一本無彼
婚姻四句

朽杜賦

高栢橋南大道傍，有古槐樹蓋數百年木也。余
少居近之，後去行路遇之，則已朽，意有緬然，輒
爲之賦，因以言衰盛之理云爾。

伊茲槐之挺植於京路之東隅得託尊於田主
據爽塏以高居垂重陰於衢周臨大路之通衢
饗春秋之所報應豐腴於無射厯漢京之康樂
踰喪亂之橫逆朱夏當陽蓊藹蕭森征夫雲會
行旅歸心輶軒停蓋輕輿託陰吉人向風而祛
袂王孫清嘯而啓襟晞甘棠之廣覆徧喬木之
無陰

瓌材枕賦

一作張紘

有卓爾之殊瓌超詭異之邈絕且其材色也如

芸之黃其爲香也如蘭之芳其文彩也如霜地而金莖紫葉而紅榮有若蒲桃之蔓延或如鬼絲之煩榮有若嘉禾之垂穎又似靈芝之吐英其似木者有類桂枝之蘭干或象灌木之叢生其似鳥者或似驚鶴之徑逝或類鴻鵠之上征有若孤雌之無味或効鴛鴦之交頸紛雲興而氣蒸般星羅而流精何衆文之炯朗灼儵爚而發明曲有所方事有所成每則異姿動各殊名衆夥不可殫形制爲方枕四角正端會綴密固

絕際無間、形妍體法、旣麗且閑、高卑得適、辟堅
每安、不屑朱碧之飾、助不煩錐鋒之鑄、鏤無丹
漆之彤、朱罔觴象之佐、副較程形而靈露、衆妙
該而悉備、珪璋特達、璵璠富也、美梓逡巡、不敢
與竝、相思庶幾、晞風於末列、神龍之姿、衆鱗相
絕、昔詩人稱角枕之繁、季世加以錦繡之飾、皆
比集異物、費日勞力、傷財害民、有損於德、豈如
茲瓊旣剖、旣斲、斯須速成一林、而莫與混并、纖
微無加、而美曄春榮、

豆羹賦

一作張翰

乃有孟秋嘉菽垂枝挺英是刈是獲充簞盈篋
香鑠和調周疾赴急時御一桮下咽三嘆時在
下邑頗多艱難空匱之厄固不綴懽追念昔日
啜菽永安

張氏外集

卷全

一

表

上壽食舉歌詩表

太始五年尚書奏使太僕傅玄中書監荀勗黃門侍郎張華各造正旦行禮及王公上壽酒食舉樂歌詩華上表勗以魏氏歌詩二三四五言與古詩不類以問司律中郎將陳頤頤曰被之金石未必皆當故勗造晉歌皆爲四言唯王公上壽酒一篇爲三言五言此則華勗所明異旨也

案魏上壽食舉詩及漢氏所施用其文句長短不齊未皆合古蓋以依詠弦節本有因循而識樂知音足以制聲度曲法用率非凡近所能改

張氏文集 卷八
二代三京。襲而不變。雖詩章詞異。興廢隨時。至其韻逗曲折。皆繫於舊。有繇然也。是以一皆因就。不敢有所改易。

薦成公綏表

竊見處士東郡成公綏。年二十五。字子安。體珪璋之資。秉不器之量。知深慮明。足以妙見。研思篤好。則仲舒之精引之。闕世貞幹。足以敦風篤俗。淵才達學。足以弘遵世教。固逸倫之殊俊。搢紳之檢式也。

議

封禪議

海內歸心，符瑞之應，備物之盛，未有若今之盛者。正宜禮中岳，封太山，禪梁父，發德號，明至尊，厚福慶，篤黎民。闕肇自生人，則有后辟，載化之數，莫之能紀。大德齊代，揮揚仁風，

晉文王謚議

殊位盛禮，實隆明德。班爵崇龐，亦光茂勲。至於表名贈號，世考洪烈，冠聲無窮者，莫尚于號謚。

也論功高于禹稷比德邁於伊周

廢黜武悼楊太后議

賈后既誅后父楊駿因宣言太后同逆
諷羣公有司奏太后亦宜廢黜惠帝詔
曰此大事更詳之華爲中書監議稱
武帝皇后不從遂廢爲庶人弑之

夫婦之道父不能得之於子子不能得之於父
皇太后非得罪於先帝者也今黨其所寵爲不
母於聖世宜依漢廢趙太后爲孝成后故事貶
太后之號還稱武皇后居異宮以全貴終之恩

黨其所寵后傳作黨
惡所親異宮作離宮

哀策

武帝哀策文

感大饗之無虧，哀罇俎之虛設。叩龍輶以長叫，
痛靈暉之潛逝。其辭曰：欽惟皇考，體道之真，德
侔乾坤，齊曜三辰。應期登禪，協於天人。上處郊
祀，下惠兆民。憲章唐虞，允得其津。搜揚仄陋，故
老是賓。百揆時序，盛業日新。恩從雲翔，威猶霆
震。江海靜波，岷岳無塵。四夷率服，莫不來臣。肅
慎奉貢，越裳効珍。化此弊俗，歸之至淳。昔在上

聖、咸、百、年、哀、哀、皇、考、用、不、是、臻、邁、厲、彌、侵、景、
命、殞、顛、舍、此、昭、晰、卽、彼、幽、玄、仰、瞻、靡、怙、廓、若、無、
天、終、制、尚、儉、率、由、典、度、華、幕、弗、陳、器、必、陶、素、不、
封、不、樹、所、在、惟、固、貽、法、來、世、是、則、是、慕、大、隧、旣、
啓、吉、日、將、征、鐘、鼓、雷、震、白、虎、抗、旌、龍、螭、驤、首、良、
駟、悲、鳴、倡、者、振、鐸、挽、夫、齊、聲、背、此、崇、殿、將、適、下、
庭、立、宮、窈、窕、修、夜、冥、冥、光、燈、永、戢、幽、闔、長、扃、仰、
訴、皇、穹、零、淚、屏、營、云、誰、能、忍、寄、之、我、情、結、心、墳、
隴、永、憑、聖、靈、

武元楊皇后哀策文

天地配序化成兩儀王假有道冀在伉儷姜嫄
佐譽二妃興媯仰希古昔覲亦同規今胡不然
景命夙虧嗚呼哀哉我應圖籙臨統萬方正位
於內實在嬪嬙天作之合駿發其祥河嶽降靈
啓祚華陽奕世豐衍朱紉斯煌纘女惟行受命
溥將來翼家邦憲度是常緝熙陰教德聲顯揚
昔我先妣暉曜休光后承前訓奉述遺芳宜嗣
徽音繼序無荒如何不弔背世隕喪瑤齊無主

長去蒸嘗追懷永悼率土摧傷嗚呼哀哉陵兆
既窆將遷幽都宵陳夙駕元妃其徂宮闈逼密
階庭空虛設祖布紼告駕啓途服輦綸狄寄象
容車金輅掩藹裳帳不舒千乘動軫六驥踟躕
銘旌樹表翼柳雲敷祁祁同軌岌岌蒸徒孰云
不懷哀感萬夫甯神虞卜安體玄廬土房陶簋
齊制遂初依行紀謚聲被八區雖背明光亦歸
皇姑沒而不朽世德作謨嗚呼哀哉

誄

章懷皇后誄

自天陶靈，必有徵祥。誕在初載，亦曜神光。顯應
天祿，聿嬪聖皇。受氣自然，實聽清和。内含茂質，
外發英華。身處宸極，敬恭惟夙。窈窕淑媚，柔順
婉穆。宣慈內政，流化太微。六宮變雅，清我壺闈。
經綸庶屬，積思萬機。旣臻緝熙，玄澤流衍。將翼
我后，登封降禪。氛祲告妖，沉結彌留。奄忽升遐，
棄世高遊。聖上哀懷，感切悼心。率土高素，追密

八音眇眇遊靈將焉所之。容光幽邁豈有反期。
杳杳新宮下絕三泉。茫茫陵域合體中原。委棄
暉章卽安太清。

魏劉驃騎誄

昔在殷周惟伊惟呂穆穆公侯紹茲勲緒如何
上天殲我鼎輔金剛玉潤水潔冰清郁郁文彩
煥若朝榮功遂身退致仕懸輿志邈留侯心邁
二疎風凜凜以翼衡雲霏霏以承蓋旒聯翩以
飄颻旌續紛以奄薄

列文先生鮑玄泰誄

於鑠列文、續黉皇祚、夏后基命、靈根已固、杞鄫
旣微、枝離葉布、爰暨叔牙、世贊齊風、翼桓濟管
遂登霸功、越在漢隆、三司竝蹤、烈考中丞、妙世
顯名、峩峩先生、誕資英俊、淑質清淳、蘭芳玉潤、
抗行崇邈、遊心大順、允文允明、聰昭秀哲、啓寔
演幽、守文命世、抱道冲虛、執義貞厲、栖遲無悶、
不營不忮、擬志雲霄、致命窮達、行爲範軌、言成
隱括、宜登遐年、弘此徽猷、濟濟縉紳、永挹清流、

取識遺音、日想表儀、孰云玄泰、曾不我知、感傷
慷慨、揮涕滲澌、已矣鮑子、甯爾玄陰、振聲竹帛、
永播徽音、

箴

女史箴

惠帝時華懼后族之盛作女史箴以諷

茫茫造化，兩儀始分。散氣流形，既陶既甄。在帝
庖犧，肇經天人。爰始夫婦，以及君臣。家道以正，
而王猷有倫。婦德尚柔，含章貞吉。婉婉淑慎，正
位居室。樊姬感莊，不食鮮禽。衛女矯桓，耳忘和
音。志厲義高，而二主易心。玄熊攀檻，馮媛趨進。
夫豈無畏？知死不恡。班妾有辭，割歡同輦。夫豈

不懷防微慮遠。道罔隆而不殺。物無盛而不衰。
日中則昃。月滿則微。崇猶塵積。替若駭機。人咸
知飾其容。而莫知飾其性。性之不飾。或愆禮正。
斧之濫之。克念作聖。出其言善。千里應之。苟違
斯義。同衾以疑。出言如微。而榮辱由茲。勿謂幽
昧。靈鑒無象。勿謂玄漠。神聽無響。無矜爾榮。天
道惡盈。無恃爾貴。隆隆者墜。鑒於小星。戒彼攸
遂。比心螽斯。則繁爾類。懼不可以瀆。寵不可以
專。專實生慢。愛極則遷。致盈必損。理有固然。美

者自美。翩以取尤。冶容求好。君子所仇。結恩而
絕職。此之由故。曰翼翼矜矜。福所以興。靖恭自
思。榮顯所期。女史司箴。敢告庶姬。造化一作元化

大司農箴

家有廬井。王有廩籍。阜茂豐物。和鈞闕石。在周
之室。不虔政首。棄稷弗修。不籍千畝。匱神乏祀。
敗於戎醜。穡臣司農。敢告左右。一本無家有廬井四句

尚書令箴 一刻摯虞

明明先王。開國承家。作制垂憲。仰觀列曜。俯令

百官政用罔憊。昔舜納大麓。七政以齊。內成外
平。而風雨不迷。仲山翼周。靡剛靡柔。補我袞闕。
聞我王猷。王猷允塞。而四海咸休。雖曰聖明。必
資良材。無曰我智。官不任能。發言如絲。其出成
綸。千里之應。樞機在身。世季道缺。天綱縱替。旣
無老成。改舊法制。法制不修。不長厥裔。尚臣司
臺。敢告侍衛。

環材枕箴

或或其文。馥馥其芬。出自幽阻。升于氈茵。允環

允麗惟淑惟珍安安文枕二被弁冠冠御于書
枕式于昏代作充用榮已甯身興寢有節適性
和神

引方外集

卷全

銘

倚几銘

倚几之設。設而不倚。作器於此。成禮於彼。

杖銘

不正陷墜。不安傾危。

張氏先集

卷全

七

不立開測不妄斷

特錄

新其之期期而不食言

附其端

書

與褚陶書

陶字季雅、吳郡錢塘人、清談閑默、以墳典自娛、吳平、武帝補臺郎、建中校尉、華爲司空、與陶書、

二陸龍躍於江漢、彥先鳳鳴於朝陽、自此以來、常恐南金已盡、而得復之於吾子、故知延州之

德不孤、淵岱之寶不匱

世說云、張華見褚陶、語陸平原曰、君兄弟龍躍

雲津、顧彥先鳳鳴朝陽、謂東南之寶已盡、不意復見褚生、陸曰、公未覩不鳴不躍者耳、華曰、故知延州之德不孤、川嶽之寶不匱矣、不云是書、

報雷煥書

所致詳觀劒文、真干將也、莫邪何復不至、雖然
天生神物終當合耳、真晉書作何復不至、尺牘作可復至否、

暫西帖

得書爲慰、僕諸惛疾已甚、蹙西卧歸還、乃悉比
將念、反不具張華呈、

問

甲乙問

安豐太守程諒先已有妻後又娶遂立二嫡前妻亡後妻子勲疑所服中書令張華造甲乙之問

甲娶乙爲妻後又娶景匿不說有乙居家如二嫡無有貴賤之差乙亡景之子當何服本實竝列嫡庶不殊雖二嫡非正此失在先人子何得專制折其親也若爲庶母服又不成爲庶進退不知所從

張氏外集

卷全

九

山不暇視

新書神液其味甜而微厚其氣不烈而

其味甘而不膩其性平而不寒其功

補虛而益氣之效

甲子之歲

乙丑之歲

丙寅之歲

丁卯之歲

問

序

博物志序

余視山海經及禹貢爾雅說文地志雖曰悉備
各有所不載者作略說出所不見麤言遠方陳
山川位象吉凶有徵諸國境界犬牙相入春秋
之後竝相侵伐其土地不可具詳其山川地澤
略而言之正國十二博物之士覽而鑒焉

張氏先集

卷全

贊

博物志地理略贊

地理廣大、四海八方、遐遠別域、略以難詳、侯王
設險、守國保疆、遠遮川塞、近備城隍、司察姦非、
禁禦不良、勿恃危阨、恣其淫荒、無德則敗、有德
則昌、安居猶懼、乃可不亡、進用忠良、社稷永康、
教民以孝、舜化以彰、

即為定其辭語我世不才世系孰足為言
葉雖不其世世世世世世世世世世世世
姑領守國公卿迎迎迎迎迎迎迎迎迎迎迎
世世世世世世世世世世世世世世世世
新洲志世世世世世

樂歌

晉四廂樂歌

王公上壽詩

稱元慶奉聖觴，后皇延遐祚，安樂撫萬方。

食舉東西廂樂詩

明明在上，丕顯厥繇，翼翼三壽，蕃后惟休，羣生
漸德，六合承流，三正元辰，朝慶鱗萃，華夏奉職，
貢八荒覲殊類，黻冕充廣庭，鳴玉盈朝位。

其二

濟濟朝位言觀其光儀序旣以時禮文煥以彰
思皇享多祐嘉樂永無央

其三

九賓在庭臚讚旣通升瑞奠贄乃侯乃公穆穆
天尊隆禮動容履端承元吉介福御萬邦

其四

朝享上下咸雍崇多儀繁禮容舞盛德歌九功
揚芳烈播休蹤

其五

皇化洽、洞幽明、懷柔百神、輯祥禎、潜龍躍、彫虎
仁、儀鳳鳥、屈游麟、枯蠹榮、竭泉流、菌芝茂、枳棘
柔、和氣應、休徵弦、協靈符、彰帝期、綏宇宙、萬國
和、昊天、成命、賚皇家、賚皇家、

其六

世資聖哲、三后在天、啓鴻烈、啓鴻烈、隆王基、率
土謳吟、欣戴於時、恒文象、代氣著期、

其七

泰始開元、龍升在位、四隩同風、燮甯殊類、五韞

來備嘉生以遂疑庶績臻大康申繁祉肩無疆
本枝百世繼緒不忘繼緒不忘休有烈光永言
配命惟晉之祥

其八

聖明統世篤皇仁廣大配天地順動若陶鈞玄
化參自然至德通神明清風暢八極流澤被無
垠

其九

於皇時晉奕世齊聖惟天降嘏神祇保定弘濟

區夏允集大命、有命旣集、光帝猷、大明重曜、鑒
六幽、聲教洋溢、惠滂流、惠滂流、移風俗、多士盈
朝、賢俊比屋、敦世心、斲彫反素樸、反素樸、懷庶
方、干戚舞階庭、疏狄悅遐荒、扶南假重譯、肅慎
襲衣裳、雲覆雨施、德洽無疆、旁作穆穆仁化祥、

其十

朝元日、賓王庭、承宸極、當盛明、衍和樂、竭祗誠
仰嘉惠、懷德馨、遊淳風、泳淑清、協億兆、同歡榮
建皇極、統天位、運陰陽、御六氣、殷羣生、成性類

王道浹治功成、人倫序俗化清、虔明祀祇三靈
崇禮樂式儀刑、

其十一

慶元吉宴三朝、播金石、詠泠簫奏九夏、舞雲韶
邁德音、流英聲、八絃一、六合甯、六合甯承聖明、
王澤洽、道登隆、綏函夏、總華戎、齊德教、混殊風
混殊風、康萬國、崇夷簡、尚敦德、弘王度、遠遐則
正旦大會行禮詩

於赫皇祖、廸指齊聖、經緯大業、基天之命、克開

洪緒誕篤天慶旁濟彝倫仰齊七政

其二

烈烈景皇克明克聰靜封略定勳功成名立政
儀刑萬邦式固崇軌光紹前蹤

其三

允文烈考濬哲應期參德天地比功四時大亨
以正庶績咸熙肇啓晉宇遂登皇基

其四

明明我后玄德通神受終正位協應天人容民

厚下育物流仁躋我王道輝光日新

晉冬至初歲小會歌

日月不留四氣廻周節慶代序萬國同

一作休成

庶尹羣后奉壽

一作爵

升朝我有嘉禮式宴百僚

繁肴綺錯旨酒泉淳笙鏞和奏磬管流聲上隆

其愛下盡其心宜其壅滯訓

一作詠

之德音乃宣

乃訓配享交泰永戴仁風長撫無外

晉宴會歌

亶亶我皇配天垂光留精日昃經覽無方聽朝

有暇延命衆臣冠蓋雲集罇俎星陳肴蒸多品
八珍代變羽爵無筭究樂極宴歌者流聲武者
投袂動容有節絲竹竝設宣暢四體繁手趣摯
懽足發和酣不忘禮好樂無荒翼翼濟濟

晉中宮所歌

先王統大業玄化漸八維儀刑乎萬邦內訓隆
壺闈皇英垂帝典大雅詠三妃執德宣隆教正
位理厥機一作司含章體柔順率禮蹈謙祗螽斯
弘慈惠樛木逮幽微徽音穆清風高義邈不追

遺榮參日月百世仰餘暉

晉宗親會歌

族燕明禮順餽食序親親骨肉散不殊昆弟豈
他人本枝篤同慶棠棣著先民於皇聖明后天
覆弘且仁降禮崇親戚旁施協族姻式宴盡酣
娛飲御備羞珍和樂旣宜洽上下同歡欣德教
加四海敦睦被無垠

晉正德大豫舞歌

正德舞歌

曰皇上天，玄鑒惟光。神器周回，五德代章。祚命于晉，世有哲王。弘濟區夏，陶甄萬方。大明垂耀，旁燭無疆。蚩蚩庶類，風德永康。皇道惟清，禮樂斯經。金石在縣，萬舞在庭。象容表慶，協律被聲。軼武超護，取節六英。同進退讓，化漸無形。大和宜洽，通于幽冥。

大豫舞歌

惟命之命，符運有歸。赫赫大晉，三后重暉。繼明紹世，光撫九圍。我皇朝期，遂在璇璣。羣生屬命，

奄有庶邦，慎徽五典，玄教遐通，萬方同軌，率土
咸雍，爰制大豫，宣德舞功，醕化旣穆，王道協隆，
仁及草木，惠加昆蟲，億兆夷人，悅仰皇風，丕顯
大業，永世彌崇。

晉凱歌

命將出征歌

重華隆帝道，戎蠻或不賓，徐夷興有周，鬼方亦
違殷，今在聖明世，寇虐動四垠，豹狼染牙爪，羣
生號穹旻，元帥統方夏，出車撫涼秦，衆貞必以

律藏否實在人威信加殊類疎逃思自親單醪

豈有一作無味挾纊感至仁武功尚止戈七德美

安民遠跡由斯舉永世無風塵

勞還師歌

獬豸背天德構亂擾邦畿戎車震朔野羣帥贊

皇威將士齊心旅感義忘其私勢積如韞拏赴

節如發機嘯聲動山谷金光曜素暉揮戟

晉書作戈

陵勁敵武步蹈橫屍鯨鯢皆授首北土永清夷

昔徃冒隆暑今來白雪霏征夫信勤瘁自古詠

采薇牧榮於舍爵燕喜在凱歸

晉白紵舞歌詩

輕○軀○徐○起○何○洋○洋○高○舉○兩○手○白○鵠○翔○宛○若○龍○轉○
乍○低○昂○凝○停○善○睭○容○儀○光○如○推○若○引○留○且○行○隨○
世○而○變○誠○無○方○舞○以○盡○神○安○可○忘○晉○世○方○昌○樂○
未○央○質○如○輕○雲○色○如○銀○愛○之○遺○誰○贈○佳○人○制○已○
爲○袍○餘○作○巾○袍○以○光○軀○巾○拂○塵○麗○服○在○御○會○佳○
賓○醪○醴○盈○樽○美○且○淳○清○歌○徐○舞○降○祇○神○四○座○歡○
樂○胡○可○陳○

其二

雙袂齊舉鸞鳳翔，羅裙飄颻昭儀光。趨步生姿進流芳，鳴弦清歌及三陽。人生世間如電過，樂時每少苦日多。幸及良辰耀春華，齊倡獻舞趙女歌。羲和馳景逝不停，春露未晞嚴霜零。百草凋索，花花英，蟋蟀吟牖寒蟬鳴。百年之命忽若傾，早知迅速兼燭行。東造扶桑遊紫庭，西至崑崙戲會城。

其三

陽春白日風花香、趨步明玉舞瑤璫、聲發金石、媚笙簧、羅袿徐轉紅袖揚、清歌流響繞鳳梁、如、矜、若、思、凝、且、翔、轉、眄、遺、精、豔、輝、光、將、流、將、引、雙、鴈、行、歡、來、何、晚、意、何、長、明、君、御、世、永、歌、昌、

晉杯槃舞歌詩

晉世甯四海平、普天安樂永大甯、四海安天下、歡、樂、治、興、隆、舞、杯、槃、舞、杯、槃、何、翩、翩、舉、坐、翻、覆、壽、萬、年、天、與、日、終、與、一、左、回、右、轉、不、相、失、箏、笛、悲、酒、舞、疲、心、中、慷、慨、可、健、兒、樽、酒、甘、絲、竹、清、願

令諸君醉復醒、醉復醒、時合同四座、歡樂皆言
工。絲。竹。音。可。不。聽。亦。舞。此。槃。左。右。輕。自。相。當。合。
坐。歡。樂。人。命。長。人。命。長。當。結。友。千。秋。萬。歲。皆。老。
壽。

拂舞歌三首

白鳩篇

翩翩白鳩、載飛載鳴、懷我君德、來集君庭、白雀
呈瑞、素羽明鮮、翔庭舞翼、以應仁乾、交交晉書作皎
皎鳴鳩、或丹或黃、樂我君惠、振羽來翔、東壁餘

光魚在江湖惠而不費敬我微軀策我良駟習

我驅馳與君周旋樂道亡餘晉書作忘饑我心虛靜

我志霑霑彈琴鼓瑟聊以自娛凌雲登臺浮旂

太清板龍附鳳目晉書作自宋書作目望身輕

獨漉篇

獨漉獨漉晉書作獨獨祿祿水深泥濁泥濁尚可水深

殺我雍雍雙鴈遊戲田畔我欲射鴈念子孤散

翩翩浮萍得風搖宋書作遙我心何合與之同并

空牀低帷誰知無人夜衣錦繡誰別僞真刀鳴

衢中倚牀無施父。冤不報。欲活何爲猛虎斑斑。
遊戲山間。虎欲齧人不避豪賢。

濟濟篇

暢○飛○暢○舞○

晉書作暢
暢飛舞

氣○流○芳○追○念○三○五○大○綺○黃○

去○失○有○時○可○行○去○來○同○時○

晉作去
來同時

此○未○央○時○冉○

冉○近○桑○榆○但○當○有○酒○爲○歡○娛○衰○老○逝○有○何○期○

晉作

何有

多○憂○耿○耿○內○懷○思○淵○池○廣○

晉作
曠

魚○獨○希○願○

得○黃○浦○衆○所○依○恩○感○人○世○無○比○悲○歌○且○舞○無○極○

已○

張氏先集

卷五

三

詩

遊獵篇

歲暮凝霜結，堅冰涸幽泉。厲風蕩原隰，浮雲蔽
昊天。玄雲晦，輓合素雪紛連翩。鷹隼始擊，鷙虞
人獻時鮮。嚴駕鳴儔侶，攬轡過中田。戎車方四
牡，文軒馭紫燕。輿徒旣整飭，容服麗且妍。武騎
列重圍，前驅抗修旃。倏忽似回飈，絡繹若浮烟。
鼓噪山淵動，衝塵雲霧連。輕繪拂素電，纖網蔭
長川。游魚未暇窺，歸鴈不得還。
一作旋由基控繁

弱公差操黃間、機發應弦倒、一倒連雙肩、僵禽
正狼藉、落羽何翻翻、積獲被山阜、流血丹中原、
馳騁未及勦、曜靈俄移晷、結罝彌藪澤、囂聲振
四鄙、鳥驚觸白刃、獸駭掛流矢、仰手接遊鴻、舉
足就羴兕、如黃批狡兔、青骹撮飛雉、鵠鷺不盡
收、鳬鷺安足視、日冥徒御勞、賞勤課能否、野饗
會衆賓、玄酒甘且旨、燔炙播遺芳、金觴浮素蟻、
珍羞墜歸雲、纖肴出淶水、四氣運不停、年時何
亹亹、人生忽如寄、居世遽能幾、至人同禍福、達

士等生死榮辱渾一門安知惡與美遊放使心
狂覆車難再履伯陽爲我誠檢跡投清軌

遊俠篇

翩翩四公子濁世稱賢名龍虎相交爭七國竝
抗衡食客三千餘門下多豪英遊說朝夕至辨
士自縱橫孟嘗東出關濟身由鷄鳴信陵西反
魏秦人不窺兵藝文類聚作開濟彊趙勝南詛楚乃與毛
遂行黃歇北適秦太子還入荆美哉遊俠士何
以尚四卿我則異於是好古師老彭

博陵王宮俠曲

俠客樂幽險。築室窮山陰。燎獵野獸稀。施網川
無禽。歲暮饑寒至。慷慨頓足吟。窮令壯士激。安
能懷苦心。干將坐自繁。弱控餘音。耕佃窮淵
陂。種粟著劒鐔。收秋狹路間。一擊重千金。棲遲
熊羆穴。容與虎豹林。身在法令外。縱逸常不禁。

其二

雄兒任氣俠。聲蓋少年場。借友行報怨。殺人租
市旁。吳刀鳴手中。利劒嚴秋霜。腰間義素戟。手

持白頭鑲騰超如激電迴旋如流光奮擊當手
決交屍自縱橫寧爲殤鬼雄義不入園墻生從
命子遊死聞俠骨香身沒心不懲勇氣加四方

門有車馬客行

門有車馬客問君何鄉士捷步往相訊果是舊
鄰里語昔有故悲論今無新喜清晨相訪慰日
暮不能已詞端競未究忽唱分途始前悲尚未
弭後憂方復起

輕薄篇

末世多輕薄。驕代

一作或

好浮華。志意既

一作能

放

逸。貲財亦豐奢。被服極纖麗。肴膳盡柔嘉。童僕

餘粱肉。婢妾蹈綾羅。文軒樹羽蓋。乘馬鳴玉珂。

橫簪刻玳瑁。長鞭錯象牙。足下金鑄履。手中雙

莫耶。賓從煥絡繹。侍御何芬葩。朝與金張期暮

宿。許史家。甲第面長街。朱門赫嵯峨。蒼梧竹葉

清。宜城九醞醑。浮醪隨觴轉。素蟻自跳波。美女

興齊趙。妍唱出西巴。一顧城國傾。千金甯

樂府作不

足多。北里獻奇舞。大陵奏名歌。新聲踰激楚。妙

妓絕陽阿、玄鶴降浮雲、鰭魚躍中河、墨翟且停
車、展季猶咨嗟、滄于前行酒、雍門坐相和、孟公
結重關、賓客不得蹉、三雅來何遲、耳熱眼中花
盤案互交錯、坐席咸誼譁、簪珥咸墮落、冠冕皆
傾邪、酣飲終日夜、明燈繼朝霞、絕纓尚不言、安
能復顧他、留連彌信宿、此歡難可過、人生若浮
寄、年時忽蹉跎、促促朝露期、榮樂遽幾何、念此
腸中悲、涕下自滂沱、但畏執法吏、禮防且切磋、

壯士篇

詩

天地相震蕩回薄不知可

一作

窮人物稟常格有

始必有終年時俛仰過功名宜速崇壯士懷憤
激安能守虛冲乘我大宛馬撫我繁弱玄長劍
橫九野高冠拂玄穹慷慨成素霓嘯吒起清風
震響駭八荒奮威躍四戎濯鱗滄海畔馳騁大
漠中獨步聖明世四海稱英雄

蕭史曲

蕭史愛長

一作少

年羸女玄童顏火粒願排棄霞

霧好登攀龍飛逸

一作竟

天路鳳起出秦關身去

長不返，蕭聲時往還。

祖道征西應詔詩

赫赫大晉奄有萬方，陶以仁化，曜以天光。貳跡
陝西，實在我王。內飪玉鉉，外惟鷹揚。四牡揚鑣，
玄輅振綏。庶寮羣后，餞飲洛湄。感離歎悽，慕德
遲遲。

祖道趙王應詔詩

崇選穆穆，利建明德。

一作明明

於顯穆親，時惟我王。

稟姿自然，金質玉相。光宅舊趙，作鎮冀方。休寵

曲錫備物煥彰發朝上京出自天邑百寮餞行
縉紳具集軒冕峩峩冠蓋習習戀德惟懷永歎
弗及

太康六年三月三日後園會詩

暮春元日陽氣清明祁祁甘雨膏澤流盈習習
祥風啓滯導生禽鳥翔逸一作逸豫卉木一作桑麻滋榮
纖條被綠翠華含英

其二

於皇我后欽若昊乾順時省物言觀中園讌及

羣辟乃命乃延

一作初筵

合樂華池、祓濯清川、汎彼

一作汎汎

龍舟、泝游洪源

藝文作泝
潜游源

其三

朱幕云覆、列坐文茵、羽觴波騰、品物備珍、管絃繁會、變用奏新、穆穆我皇、臨下渥仁、訓以慈惠、詢納廣神、好樂無荒、化達無垠、

其四

咨予微臣、荷寵明時、忝恩於外、攸攸三期、犬馬惟慕、天實爲之、靈啓其願、邀願在茲、於以表情

爰著斯詩

上巳篇

仁風導和氣，句芒御昊春。姑洗應時月，元巳啓
良辰。密雲蔭朝日，零雨灑微塵。飛軒遊九野，置
酒會衆賓。臨川懸廣幕，夾水布長茵。徘徊存往
古，慷慨慕先真。朋從自遠至，童冠八九人。追好
舞雩庭，擬跡洙泗濱。伶人理新樂，膳夫然時珍。
八音礪礪奏，肴俎從橫陳。妙舞起齊趙，悲歌出
三秦。春醴踰九醞，冬清過十旬。盛時不努力，歲

暮將何因、勉哉衆君子、茂德景日新、高飛舞鳳
翼、輕舉攀龍鱗、

勵志詩

大儀幹

烏括反

運、天迴地游、四氣鱗次、寒暑環周、

星火旣夕、忽焉素秋、涼風振落、熠燿宵流、

其二

吉士思秋、實感物化、日與月與、

平聲

荏苒代謝、逝

者如斯、曾無日夜、嗟爾庶士、胡甯自舍、

其三

仁道不遐、德輶如羽、求焉斯至、衆鮮克舉、大猷
玄漠、將抽厥緒、先民有作、貽我高矩、

其四

雖有淑姿、放心縱逸、出般於游、居多暇日、如彼
梓材、弗勤丹漆、雖勞樸斲、終負素質、

其五

養由矯矢、獸號於林、蒲蘆縈繳、神感飛禽、未伎
之妙、動物應心、研精耽道、安有幽深、

其六

安心恬蕩，棲志浮雲。體之以質，彪之以文。如彼
南畝，力未旣勤。蔗蓰致功，必有豐殷。

其七

水積成川，載瀾載清。土積成山，歆蒸鬱冥。山不
讓塵，川不辭盈。勉爾一作志含弘，以隆德聲。

其八

高以下基，洪由纖起。川廣自源，成人一作志在始。累微
以著，乃物之理。纒牽之長，實累千里。

其九

復禮終朝，天下歸仁。若金受礪，若泥在鈞。進德修業，輝光日新。隰朋仰慕，予亦何人。

答何劭

吏道何其迫，窘然坐自拘。纓綬爲徽纆，文憲焉可踰。恬曠苦不足，煩促每有餘。良朋貽新詩，示我以游娛。穆如灑清風，煥若春華敷。自昔同寮案，於今比園廬。衰疾近辱殆，庶幾竝懸輿。散髮重陰下，抱杖臨清渠。屬耳聽鶯鳴，流目翫儵魚。從容養餘日，取樂於桑榆。

其二

洪鈞陶萬類，大塊稟羣生。明闇信異姿，靜躁亦殊形。自予及有識，志不在功名。虛恬竊所好，文學少所經。忝荷旣過任，白日已西傾。道長苦智短，責重困才輕。周任有遺規，其言明且清。負乘爲我戒，夕惕坐自驚。是用感嘉貺，寫心出中誠。發篇雖溫麗，無乃違其情。

其三

駕言歸外庭，放志永棲遲。相伴步園疇，春草鬱

張氏文集 卷之八 早
鬱滋榮觀，雖盈目親友。莫與偕，悟物增隆思。結
戀慕同儕，援翰屬新詩。永歎有餘懷。

情詩

清風動簾帷，晨月照

五臣作燭

幽房。佳人處遐遠，蘭

室無容光。襟懷擁虛景，輕衾覆空牀。居歡惜夜

促，在戚怨宵長。拊

五臣作撫

枕獨嘯歎，感慨心內傷。

其二

游目四野外，逍遙獨延伫。蘭蕙緣清渠，繁華蔭
綠渚。佳人不在茲，取此欲誰與。巢居知風寒，穴

處識陰雨，不曾遠別離。安知慕儔侶。

其三

北方有佳人，端坐鼓鳴琴。終晨撫管絃，日夕不成音。憂來結不解，我思存所欽。君子尋時役，幽妾懷苦心。初爲三載別，於今久滯淫。昔耶生戶牖，庭內自成陰。翔鳥鳴翠偶，草蟲相和吟。心悲易感激，俛仰淚流衿。願託晨風翼，束帶侍衣衾。

其四

明月曜清景，曦光照玄墀。幽人守靜夜，迴身入。

空帷束帶俟將朝，廓落晨星稀。
寐假交情爽，覲我佳人姿。
巧笑媚懽懽，一作謹靨聯娟眸與眉。
寤言增長歎，悽然心獨悲。

其五

君居北海陽，妾在江南陰。
懸邈極修途，一作修途遠山川阻且深。
承懽注隆愛，結分投所欽。
銜恩一作思篤守義，萬里託微心。

感婚詩

駕言遊東邑，東邑紛攘攘。
婚姻及良時，嫁娶避

當梁窈窕出閨女，嬋婉姬與姜。素顏發紅華，美目流清揚。韓煒衆親盛，於我猶若常。譬彼暮春草，榮華不再陽。

雜詩

晷度隨天運，四時互相承。東壁正昏中，涸陰寒節升。繁霜降當夕，悲風中夜興。朱火青無光，蘭膏坐自凝。重衾無暖氣，挾纊如懷冰。伏枕終遙夕，寤言莫予應。永思慮崇昔，慨然獨拊膺。

其二

逍遙游春空

一作宮

容與淶池阿、白蘋開素葉、朱

草茂丹華、微風搖蒹若、增波動芰荷、榮彩曜中
林、流馨入綺羅、王孫遊不歸、修路邈以遐、誰與
翫遺芳、伫立獨咨嗟、

其三

荏苒日月運、寒暑忽流易、同好逝不存、迢迢遠
離析、房櫳自來風、戶庭無行迹、蒹葭生牀下、蛛
蝥網四壁、懷思豈不隆、感物重鬱積、遊鴈比翼
翔、歸鴻知接翮、來哉彼君子、無愁徒自隔、

擬古

松生壟坂上，百尺下無枝。東南望河尾，西北隱崑崖。剛風振山籟，朋鳥夜驚離。悲涼貫年節，葱翠恒若斯。安得草木心，不怨寒暑移。

遊仙詩

雲霓垂藻旒，羽袿揚輕裾。飄登清雲間，論道神皇廬。蕭史登鳳音，王后吹鳴竽。守精味玄妙，逍遙無爲墟。

其二

玉佩連浮星、輕冠結朝霞、列坐王母堂、艷體飡
瑤華、湘妃詠涉江、漢女奏陽阿、

其三

乘雲去中夏、隨風濟江湘、疊疊陟高陵、遂升玉
巒陽、雲娥薦瓊石、神妃侍衣裳、

贈摯仲洽詩

君子有逸志、棲遲於一邱、仰蔭高林茂、俯臨淥
水流、恬淡養玄虛、沈精研聖猷、

招隱

隱士託山林遁世以保真連惠亮未遇雄才屈
不伸

其二

棲遲四野外陸沈背當時循名掩不著藏器待
無期羲和策六龍弭節越崦嵫盛年俛仰過忽
若振輕絲

荷詩

荷生綠泉中碧葉齊如規迴蕩流霧珠映水逐
條垂照灼此金塘藻曜君王池不愁世嘗絕但

張茂先集

卷全

四

畏盛明移

橘詩

橘生湘水側、非陋人莫傳、逢君金華宴、得在玉
几前

本傳

張華字茂先，范陽方城人也。父平，魏漁陽郡守。華少孤貧，自牧羊。同郡盧欽見而器之。鄉人劉放亦奇其才。以女妻焉。華學業優博，辭藻溫麗，朗瞻多通，圖緯方伎之書莫不詳覽。少自修謹，造次必以禮度。勇於赴義，篤于周急。器識弘曠，時人罕能測之。初未知名，著鷦鷯賦以自寄。見賦本陳留阮籍見之，嘆曰：「王佐之才也。」由是聲名始著。郡守鮮于嗣薦華爲太常博士。盧欽言之。

於文帝轉河南尹丞未拜除佐著作郎頃之遷
長史兼中書郎朝議表奏多見施用遂卽真晉
受禪拜黃門侍郎封關內侯華強記默識四海
之內若指諸掌武帝嘗問漢宮室制度及建章
千門萬戶華應對如流聽者忘倦畫地成圖左
右屬目帝甚異之時人比之子產數歲拜中書
令後加散騎常侍遭母憂哀毀過禮中詔勉厲
逼令攝事初帝潛與羊祜謀伐吳而羣臣多以
爲不可唯華贊成其計其後祜疾篤帝遣華詣

祐問以伐吳之計。語在祐傳。及將大舉。以華爲度支尚書。及量計運漕。決定廟筭。衆軍旣進。而未有尅獲。賈充等奏誅華以謝天下。帝曰。此是吾意。華但與吾同耳。時大臣皆以爲未可輕進。華獨堅執以爲必尅。及吳滅。詔曰。尚書關內侯張華前與故太傅羊祐共創大計。遂典掌軍事。部分諸方。筭定權略。運籌決勝。有謀謨之勲。其進封爲廣武縣侯。增邑萬戶。封子一人爲亭侯。千五百戶。賜絹萬匹。華名重一世。衆所推服。晉

吏及儀禮憲章竝屬於華多所損益當時詔誥
皆所草定聲譽益盛有台輔之望焉而荀勗自
以大族恃帝恩深憎疾之每伺間隙欲出華外
鎮會帝問華誰可託寄後事者對曰明○德○至○親○
莫○如○齊○王○攸○旣○非○上○意○所○在○微○爲○忤○旨○間○言○遂
行乃出華爲持節都督幽州諸軍事領護烏桓
校尉安北將軍撫納新舊戎夏懷之東夷馬韓
新彌諸國依山帶海去州四千餘里厯世未附
者二十餘國竝遣使朝獻于是遠夷賓服四境

無虞頻歲豐稔士馬彊盛朝議欲徵華入相又欲進號儀同初華毀徵士馮恢於帝統卽恢之弟也深有寵於帝統嘗侍帝從容論魏晉事因曰臣切謂鍾會之釁頗由太祖帝變色曰卿何言邪統免冠謝曰臣愚冗瞽言罪應萬死然臣微意猶有可申帝曰何以言之統曰臣以爲善御者必識六轡盈縮之勢善政者必審官方控帶之宜故仲由以兼人被抑冉求以退弱被進漢高八王以寵過夷滅光武諸將由抑損克終

非上有仁暴之殊。下有愚智之異。蓋抑揚予奪。使之然耳。鍾會才有限。而太祖誇獎太過。加其謀猷。盛其名器。居以重勢。委以大兵。故使會自謂筭無遺策。功在不賞。輒張跋扈。遂遭凶逆耳。向令太祖錄其小能。節以大禮。抑之以權勢。納之以軌則。則亂心無由而生。亂事無由而成矣。帝曰。然。統稽首曰。陛下旣已然。微臣之言。宜思堅冰之漸。無使如會之徒。復致覆喪。帝曰。當今豈有如會者乎。統曰。東方朔有言。談何容易。

易曰、臣不密則失身、帝乃屏左右曰、卿極言之、
統曰、陛下謀謨之臣、著大功於天下、海內莫不
聞知、據方鎮、櫜戎馬之任者、皆在陛下、聖慮矣、
帝默然頃之、徵華爲太常、以太廟屋棟折、免官、
遂終帝之世、以列侯朝、見惠帝卽位、以華爲太
子少傅、與王戎、裴楷、和嶠俱以德望爲楊駿所
忌、皆不與朝政、及駿誅後、將廢皇太后、會羣臣
於朝堂、議者皆承風望、旨以爲春秋絕文姜、今
太后自絕於宗廟、亦宜廢黜、惟華議以爲宜依

漢廢趙太后爲孝成后故事貶太后之號還稱武皇后居異宮以全貴終之恩不從遂廢太后爲庶人楚王瑋受密詔殺太宰汝南王亮太保衛瓘等內外兵擾朝廷大恐計無所出華白帝以瑋矯詔擅害二公將士倉卒謂是國家意故從之耳今可遣騶虞幡使外軍解嚴理必風靡上從之瑋兵果敗及瑋誅華以首謀有功拜右光祿大夫開府儀同三司侍中中書監金章紫綬固辭開府賈謐與后共謀以華庶族儒雅有

籌略進無逼上之嫌。退爲衆望所依。欲倚以朝
綱。訪以政事。疑而未決。以問裴頴。頴素重華。深
贊其事。華遂盡忠匡輔。彌縫補闕。雖當闇主虐
后之朝。而海內晏然。華之功也。華懼后族之盛。
作女史箴以爲諷。賈后雖凶妬。而知敬重華。久
之。論前後忠勲。進封壯武郡公。華十餘讓。中詔
敦譬。乃受。數年代下邳王晃爲司空。領著作。及
賈后謀廢太子。左衛率劉卞甚爲太子所信遇。
每會宴。卞必預焉。屢見賈謐驕傲。太子恨之。形

於言色謚亦不能平。卞以賈后謀問華。華曰。不聞。卞曰。卞以寒悴自須昌小吏。受公成拔。以至今日。士感知已。是以盡言。而公更有疑於卞邪。華曰。假令有此。君欲如何。卞曰。東宮俊乂如林。四率精兵萬人。公居阿衡之任。若得公命。皇太子因朝入錄。尚書事廢。賈后於金墉城兩黃門力耳。華曰。今天子當陽。太子人子也。吾又不愛阿衡之命。忽相與行此。是無其君父。而以不孝示天下也。雖能有成。猶不免罪。况權戚滿朝。威

柄不一而可以安乎。及帝會羣臣于式乾殿。出太子手書徧示羣臣。莫敢有言者。惟華諫曰。此國之大禍。自漢武以來。每廢黜正嫡。恒至喪亂。且國家有天下日淺。願陛下詳之。尚書左僕射裴頠以爲宜先檢校傳書者。又請比校太子手書。不然。恐有詐妄。賈后乃內出太子素啓事十餘紙。衆人比視。亦無敢言非者。議至日西不決。后知華等意堅。因表乞免爲庶人。帝乃可其奏。初。趙王倫爲鎮西將軍。撓亂關中。氐羗反叛。乃

以梁王彤代之。或說華曰：趙王貪昧，信用孫秀，所在爲亂。而秀變詐，奸人之雄。今可遣梁王，斬秀，刈趙之半，以謝關右，不亦可乎？華從之。彤許諾。秀友人辛冉從西來，言於彤曰：氏羗自反，非秀之爲，故得免死。倫旣還，諂事賈后，因求錄尚書事。後又求尚書令。華與裴頠皆固執，不可由。是致怨。倫秀疾華如讐。武庫火，華懼，因此變作，列兵固守。然後救之。故累代之寶及漢高斬蛇劍、王莽頭、孔子履等盡焚焉。時華見劍穿屋而

飛莫知所向。初華所封壯武郡有桑化爲栢識者以爲不祥。又華舍及監省數有妖怪。少子騫以中台星坼勸華遜位。華不從曰。天道玄遠。惟修德以應之耳。不如靜以待之。以俟天命。及倫秀將廢賈后。秀使司馬雅夜告華曰。今社稷將危。趙王欲以公共匡朝廷。爲霸者之事。華知秀等必成篡奪。乃距之。雅怒曰。亦將加頸而吐言如此。不顧而出。華方晝卧。忽夢見屋壞。覺而惡之。是夜難作。詐稱詔召華。遂與裴頴俱被收。華

將死謂張林曰、卿欲害忠臣耶、林稱詔詰之曰、卿爲宰相、任天下事、太子之廢、不能死節、何也、華曰、式乾之議、臣諫事具存、非不諫也、林曰、諫若不從、何不去位、華不能答、須臾使者至、曰、詔斬公、華曰、臣先帝老臣、中心如丹、臣不愛死、懼王室之難、禍不可測也、遂受之於前殿馬道南、夷三族、朝野莫不悲痛之、時年六十九、華性好人物、誘進不倦、至於窮賤、候門之士、有一介之善者、便咨嗟稱詠、爲之延譽、雅愛書籍、身死之

日家無餘財。惟有文史溢于机筐。嘗徙居載書三十乘。秘書監摯虞撰定官書。皆資華之本以取正焉。天下奇秘。世所希有者。悉在華所。繇是博物洽聞。世無與比。惠帝中。人有得鳥毛三丈以示華。華見。慘然曰。此謂海鳧毛也。出則天下亂矣。陸機嘗餉華鮓。于時賓客滿座。華發器。便曰。此龍肉也。衆未之信。華曰。試以苦酒濯之。必有異。旣而五色光起。機還問鮓主。果云園中茅積下得一白魚。質狀殊常。以作鮓。過美。故以相

獻武庫封閉甚密。其中忽有雉。雉。華曰。此必蛇
化爲雉也。開視。雉側果有蛇蛻焉。吳郡臨平岸
崩。出一石鼓。槌之無聲。帝以問華。華曰。可取蜀
中桐材。刻爲魚形。扣之則鳴矣。于是如其言。果
聲聞數里。初。吳之未滅也。斗牛之間。常有紫氣。
道術者皆以吳方強盛。未可圖也。惟華以爲不
然。及吳平之後。紫氣愈明。華聞豫章人雷煥。妙
達緯象。乃要煥宿。屏人曰。可共尋天文。知將來
吉凶。因登樓仰觀。煥曰。僕察之久矣。惟斗牛之

間頗有異氣。華曰：是何祥也？煥曰：寶劍之精上徹於天耳。華曰：君言得之。吾少時有相者言：吾出六十位登三事，當得寶劍佩之，斯言豈效與？因問曰：在何郡？煥曰：在豫章豐城。華曰：欲屈君爲宰，密共尋之，可也。煥許之。華大喜，卽補煥爲豐城令。煥到縣，掘獄屋基，入地四丈餘，得一石函，光氣非常。中有雙劍，竝刻題：一曰龍泉，一曰太阿。其夕斗牛間氣不復見焉。煥以南昌西山北巖下土以拭劍，光芒豔發。大盆盛水，置劍其

上視之者精芒炫目。遣使送一劒并土與華。留
一自佩。或謂煥曰。得雨送一。張公豈可欺乎。煥
曰。本朝將亂。張公當受其禍。此劒當繫徐君墓
樹耳。靈異之物。終當化去。不永爲人服也。華得
劒寶愛之。常置坐側。華以南昌土。不如華陰赤
土。報煥書。因以華陰土一斤致煥。煥更以拭劒。
倍益精明。華誅失劒所在。煥卒。子爽爲州從事。
持劒行經延平津。劒忽于腰間躍出。墮水。使人
沒水取之。不見劒。但見兩龍。各長數丈。蟠縈有

文章沒者懼而反。須臾光彩照水。波浪驚沸。於是失劍。爽嘆曰。先君化去之言。張公終合之論。此其驗乎。華之博物多此類。不可詳載焉。後倫秀伏誅。齊王冏輔政。摯虞致箋於冏。冏於是奏曰。臣聞興微繼絕。聖王之高政。貶惡嘉善。春秋之美義。是以武王封比干之墓。表商容之間。誠幽明之故。有以相通也。孫秀逆亂。滅佐命之國。誅骨鯁之臣。以斲喪王室。肆其虐戾。功臣之後。多見泯滅。張華裴頠各以見憚。取誅。於是解系

解結同以羔羊竝被其害。歐陽建等無罪而死。百姓憐之。今陛下更日月之光布維新之命。然此等諸旂未蒙恩理。昔欒郤降在阜隸。而春秋傳其違。幽王絕功臣之後。棄賢者子孫。而詩人以爲刺。臣備忝在職。思納愚誠。若合聖意。可令羣官通議。議者各有所執。而多稱其冤壯武國。臣竺道又詣長沙王。求復華爵位。依違者久之。太安二年詔曰。夫愛惡相攻。佞邪醜正。自古而有。故司空壯武公華竭其忠貞。思翼朝政。謀謨

之勲每事賴之前以華弼濟之功宜同封建而華固讓至于八九深陳大制不可得爾終有顛敗危辱之慮辭義懇誠足勸遠近華之至心誓於神明華以伐吳之勲受爵于先帝後封旣非國體又不宜以小功踰前大賞華之見害俱以奸逆圖亂濫被枉賊其復華侍中中書監司空公廣武侯及所沒財物與印綬符策遣使弔祭之初陸機兄弟志氣高爽自以吳之名家初入洛不推中國人士見華一面如舊欽華德範如

師資之禮焉。華誅後作誄。又爲詠德賦以悼之。
華著博物志十篇。及文章竝行於世。

孫馬兩集

夏辛

二

孫馮翌集

孫馮翊集題辭

子荆零雨正長朔風稱於詩家今亦
未見其絕倫也除婦服詩王武子嘆
爲情文相生然以方嵇君道伉儷詩
兄弟間耳江東未順司馬文王發使
遣書子荆與荀公曾各奮筆札孫最

傑出而荀獨見用謂勝十萬師文章
有神不在遇合朝廟之上賞音尤難
必欲如元瑜孔璋見知孟德豈易言
哉石驃騎府主也郭奕其同里也睥
睨忿爭遂致沉廢子荆平日素有傲
名鄉曲缺譽此亦其見短之一事乎

然同閨相知有一武子生死願足靈
床驢聲何必非叔夜之琴也笑賦調
謔自得反金人銘蚩薄箝口似狂非
狂言各有寄若夫長虞勁直箋頌夜
光威輦被髮遺書勸仕知人實長未
聞玩物太原名士磊落英多其爲品

狀甯讓汝頽哉

婁東張溥題

晉孫馮翊集目錄

賦

笑賦

登樓賦

同前

韓王臺賦

有序

又

井賦

雪賦

笳賦

有序

相風賦

菊花賦

蓮花賦

杖杜賦

有序

茱萸賦

鷹賦

有序

鴈賦

雉賦

蟬賦

論

屈建論

頌

尼父頌

梁令孫侯頌

贊

莊周贊

榮啓期贊

原壤贊

顏回贊

管仲贊

季子贊

白起贊

樂毅贊

韓信贊

銘

反金人銘

石人銘

碑

故太傅羊祜碑

鴈門太守牽府君碑

疏

龍見上疏

九品疏

取士疏

牋

薦傅長虞牋

謝賜鄣日牋

書

爲石苞與孫皓書

與董京書

哀文

和氏外孫道生哀文

和氏外孫小同哀文

詩

答弘農故吏民

除婦服詩

征西官屬送於陟陽侯作詩

太僕座上詩

祖道詩

之馮翊祖道詩

附錄

本傳

孫馮翊集目錄終

孫馮翌集卷全

晉太原孫 楚著

明太倉張 溥閣

賦

笑賦

有度俗之公子。總萬物之細故。心髣髴乎巢白。
以得意爲至樂。不拘戀乎凡流。會親戚於高宇。
結宗盟於綢繆。所以交頸偃仰。摧眉指掌。亢洪
聲於通谷。順長風以流響。氣參譚以相屬。若將

顏而復往。或頓蹙俛首。狀似悲愁。怫鬱唯轉。呻吟郁伊。或攜手悲嘯。噓天長叫。遲重則如陸沈。輕疾則如水漂。徐疾任其口頰。圓合得乎機要。或中路背叛。更相毀賤。傾倚。叵我彫聲。迄乎日晏。信天下之笑林。調謔之巨觀也。

登樓賦

有都城之百雉。加層樓之五尋。從明王以登極。聊暇日以娛心。涇渭汨以阻邁。卉木鬱而成林。晞朝陽之素暉。羨綠竹之茂陰。望秦墳於驪山。

觀八陵於北岑，營巷基峙，列宅萬區，黎民布野。
商旅充衢，杞柳綢繆，芙蓉吐芳，俯依青川，仰翳
朱楊，體象濛汜，幽若扶桑，白日爲之晝昏，鳥禽
爲之頡頏。

同前

有都城之百雉，加層樓之五尋，從明王之登遊，
聊暇日以娛心，鳴鳩拂羽於桑榆，游鳧濯翅於
素波，牧豎吟嘯於行陌，舟人鼓枻而揚歌，百僚
雲集，促坐華臺，嘉肴滿俎，旨酒盈杯，談三墳而

孫鴻聖集
卷八
詠五典釋聖哲之所裁

具載藝文首同四句而未互異姑兩存之

韓王臺賦

有序

酸棗寺門外夾道左右有兩故臺訪諸故老云
韓王聽訟觀也。

望韓王之故臺尋往代之所營雙闕碣以峻峙
貫雲氣而上征厯千載而特立顯玅觀於太清
薄邯鄲之叢臺陋楚國之章華邈宕堯以亢極
豈岑樓之能加至乃宮觀弘敞增臺隱天伐文
梓於萬仞發玉石於三泉優倡角烏烏之聲蛾

肩戲白雲之舞紛滛衍以低仰翳修袖而容與
又
藪邱陵之邐迤亞五嶽之嵯峩

并賦

倚崇邱以鑿井兮臨斥澤之淫洿若行潦之滓
濁兮靡清流以自娛乃喟爾而有感兮率鄰左
之數夫脉厥上以興泉兮登甘醴於玄虛體象
圓川下貫五仞幽泉勝涌津澤滂潤抱甕而汲
不設機引絕彼淫飾安此樸慎俗尚其華我篤

其信，既處涅而不緇，又磨之而不磷，雖矢志而無妄，實游心於大順，渴人來翔，行旅是賴，輟耕息肩，不期而會，沈黃、李、浮、朱、柰、雜狸首之斑如，飛清塵以洮汰，枕玄石以盥漱，喜遨怡以緩帶，

雪賦

堯九載以山栖兮，湯請禱於桑林，罔二聖以濟世兮，孰繁衍以迄今，嗟亢陽之踰時兮，情反側以寢興，豐隆灑雪，交錯翻紛，膏澤偃液，普潤中田，肅肅三麥，實獲豐年。

笳賦 有序

頃還北館、遇華髮人於潤水之濱、向春風而吹
長笳、音聲寥亮、有感余情、爰作斯賦、

銜長葭以泛吹、噉啾啾之哀聲、奏胡馬之悲思、
詠北狄之遐征、順谷風以撫節、飄逸響乎天庭、
爾乃調唇吻、整容止、揚清臚、隱皓齒、徐疾從宜、
音引代起、叩角動商、鳴羽發徵、若夫廣陵散唌、
三節白紵、太山長曲、哀及梁父、似鴻雁之將雛、
乃羣翔於河渚、

相風賦

伊聖皇之高烈、美治道之穆清、兼乾坤之普覆、
齊三光之朗明、猶恭已以勞謙、迄日昃而不甯、
慮聽政之有闕、誠禍福於無形、建殊才於辰極、
樹相風於紫庭、爾乃神獸盤其根、靈鳥據其顛、
羽族翩飄羅其側、翔風蕭聊出其間、

菊花賦

彼芳菊之爲草、今稟自然之醕精、當青春而潛
翳、今迄素秋而敷榮、於是和樂公子、雍容無爲、

翩翩華林駿足交馳薄言采之手折纖枝飛金
英以浮旨酒拂翠葉以振羽儀偉茲物之珍麗
兮超庶類而神奇

蓮花賦

有自然之麗草育靈沼之清瀨結根係於重壤
森蔓延以騰邁爾乃紅花電發暉光燁燁仰曜
朝霞俯照綠水潛細房之奧密兮含珍藕之甘
腴攢聚星列纖離相扶微若玄黎披幽夜粲若
鄧林飛鵠雛

扶杜賦

家弟以虞氏梨賦見示。余謂豈以梨有用之爲貴。杜無用之爲賤。故無用獲全。所以爲貴。有用獲殘。所以爲賤。故賦云爾。

惟有扶之爲杜。齊萬物而並生。其質菲薄。旣不施於器用。華葉踈悴。靡休陰之茂榮。昔在邵伯。聽訟述職。甘棠作頌。垂之罔極。

茱萸賦

有茱萸之嘉木。植茅茨之前庭。歷漢女而始育。

關百載而長生，森蔓延以盛興。布綠葉於紫莖，
鶉火西徂，白藏授節。零露旣凝，鷹隼飄厲。攀紫
房於纖柯，綴朱實之酷烈。應神農之本草，療生
民之疹疾。

鷹賦

有序

郭延考與余厚，其從者韞二鷹以侍側。郭邊人
也好弋獵，顧盼心欲自娛樂。請余爲賦曰：

有金剛之俊鳥，生井陘之巖阻。超萬仞之崇嶺，
蔭青松以靜處。體勁悍之自然，振肅肅之輕羽。

擒狡兔於平原，截鴻鴈於河渚。且其爲相也，疏
尾濶臆，高髻禿顙，深目蛾眉，狀似愁胡，曲觜短
頸，足若雙枯。麾則應機，招則易呼。背碣石以西
遊，經馬嶺而南徂。于時商秋旣邁，歲在玄冥。風
霜激厲，羽毛振驚。爾乃策良驥，服羔裘，鞬青骹，
戲田疇，縈深谷，繞山邱，定心意，審精眸，獸馳厥
足，鳥矯其翼，下赴幽谿，上翔辰極。隨指授以騰
踴，因升降以畢力。紛連薄以撈窰，遂陷首以摧
臆。

鴈賦

有逸豫之雋禽，稟和氣之清冲。候天時以動靜，
隨寒暑而污隆。颺同集于曠野，紛羣翔於雲中。
翳朝陽之景曜，角聲勢於晨風。族類阜繁，數則
千億。迎素秋而南遊，背青春而北息。泝長川以
鳴號，凌洪波以鼓翼。任自然而相侔，窮天壤於
八極。

雉賦

體冲和之淑質，飾羽儀於茂林。斑五色之文章，

楊皦皦之清音，設密網於巖阿，飛輕繳之雲浮，
上無逃而弗獲，下無隱而不搜，遂戢翼以就養，
隨籠栖而言歸，恒逍遙於階庭，廕朝陽之盛暉。

蟬賦

惟大化之廣御，何品數之多名，當仲夏之始出，
據長條而悲鳴，翼如羅縈，形如枯槁，終日不銜
一粒，激哀響之煩擾。

論

屈建論

加籩之品。菱芰存焉。楚多陂塘。菱所生久。自嗜之。而抑按宰祝。旣毀就養無方之禮。又失奉死如生之義。奪平素欲。建何忍焉。

疏主之疏令年為志事同故舊
之而與好學無異其志之顯矣公卒
賦靈之品受其心之別無異似主又自

薛氏

頌

尼父頌

皇矣尼父，聖哲之傑，德比天地，明齊日月。周室
陵遲，大道蕪穢，禮樂崩阻，姦雄罔世。乃養門徒，
廣延俊乂，垂訓列國，頌聲魯衛。威震夾谷，義厭
陳蔡，德之休明，幽而彌泰。超美三代，風馳雲邁。
梁令孫侯頌

於穆君侯，英才宣朗，神鑒將來，思通既往。受佐
陝西，臨我邦壤，聲之所振，下應如響。明斷決疑，

易於指掌野有寇盜惟侯屏之我有田疇惟侯
闢之古人慎獄惟侯平之凡此三惠如何勿思

張少府志

張少府志

贊

莊周贊

莊周曠蕩、高才英雋、本道根貞、歸於大順、妻亡、
不哭、亦何所懽、慢弔鼓缶、放此誕言、始矯其情、
近失自然、

榮啟期贊

榮公溫雅、旣怡旣懌、濁以徐清、寂然澹泊、援琴
自娛、詠此三樂、眉壽無彊、惟德之宅、

原壤贊

壤之輒張絕滅禮教實交仲尼同機合與聖以
之藏俗以之笑獨協區外孰知其妙

顏回贊

束身勵行宗事聖道鑽仰孜孜視予猶考

管仲贊

管生彎弓與桓是讐駿奔從糾塊爲纍囚沐浴
西郊鸞飛詹邱

季子贊

季子聰哲思心精微玄覽幽寤觸類應機

白起贊

烈烈桓桓，時唯武安。神機電斷，氣濟師然。南折勁楚，走魏禽韓。北摧馬服，凌川成丹。應侯無良，蘇子入關。噉噉讒口，火燎于原。遂焚杜郵，與蕭俱燔。惟其歿矣，古今所歎。

樂毅贊

樂生誕節，實立弘度。丹旄電麾，秦韓景附。威震濟西，齊愍失據。惠之不敏，翻然高翬。栖遲一邱，以保皓素。

韓信贊

淮陰屈節，盤於幽賤。秦失其鹿，英雄交戰。踐楚
知亡，撫戈從漢。遂寤明主，超然虎奮。威震趙魏，
擒項平難。割據山川，稱孤南面。惜哉遘疑，一朝
書叛。

銘

反金人銘

晉太廟有石人焉，大張其口而書其曾曰：我古之多言人也。無少言，無少事。少言少事，則後生何述焉？夫唯立言，名乃長久；胡爲塊然，生鉗其口？凡夫貪財，烈士殉名；盜跖爲濁，夷柳爲清；鮑肆爲臭，蘭圃爲馨；莫貴澄清，莫賤滓穢；二者言異，歸於一會。堯懸諫鼓，舜立謗木；聽采風謠，惟日不足；道潤羣生，化隆比屋；末葉陵遲，禮教彌

衰承旨則順、忤意則違、時好細腰、宮中皆饑、時
悅廣額、下作細眉、逆龍之鱗必陷斯機、括囊無
咎、乃免誅夷、顛覆厥德、可爲傷悲、則可用戒、無
妄之時、假說周廟、於言爲蚩、是以君子追而王
之

石人銘

大象無形、元氣爲母、杳兮冥兮、陶冶衆有、

碑

故太傅羊祜碑

稟二儀之純靈，膺造化之冲氣。文爲辭宗，行作
世表。遷黃門侍郎，受祕書監。公筭滅吳之略，以
爲孟獻營虎牢，而鄭人懼。晏弱城東陽，而萊子
服。乃進據險處，開建五城，收膏腴之地，奪敵人
之資。於是江浦馳義，襁負而至。雖研精軍政，用
思滅敵，然兼立學校，闡揚典訓，是以縉紳之士，
鱗集仰化。雲翔衡門，雖泮宮之詠魯侯。菁莪之

美育才無以過也。銘曰

金德發曜，惟公作輔。肇造嘉謨，建我民主。不愆遺公，俾屏聖皇。哲人其徂，孰不增傷。

鴈門太守牽府君碑

君體德允直，才量高潔。明鑒達於世變，弘毅足以致遠。聿振鴻翼於袞塵之表，卓爾先覺於擬議之前。君與劉備少長河朔，英雄同契，爲刎頸之交。俄而委質於太祖，備遂鼎足於蜀漢。所交非常，爲時所忌。每自酌損，在乎季孟之間。遷鴈

門太守教民耕戰聽斷以情信賞必罰下服其
命是以夷狄窘迫罔知所安譬秋枯之隕晨風
激雹之不及掩耳也伐叛柔服威震沙漠遺種
遠迹萬里無煙

烈烈君侯文武允崇少兼七德翰飛撫戎名揚
河朔威鎮漢中臨危運奇在難匪從廻旌東麾
撫司徐青截彼降賊海岱以平剖符千里爲國
于城

（The following text is extremely faint and largely illegible due to the quality of the scan. It appears to be a continuous block of text in vertical columns, likely a letter or a chapter section. The characters are mostly indistinguishable from the background.)

疏

龍見上疏

頃聞武庫井中有二龍。羣臣或有謂之禎祥。而
稱賀者。或有謂之非祥。無所賀者。可謂楚既失
之。而齊亦未爲得也。夫龍或俯鱗潛于重泉。或
仰攀雲漢。游乎蒼昊。而今蟠于坎井。同於蛙蝦。
者。豈獨管庫之士。或有隱伏。廝役之賢。沒於行
伍。故龍見光景。有所感悟。願陛下赦小過。舉賢
才。垂夢於傳巖。望想於渭濱。脩學宮。起淹滯。申

命公卿舉獨行君子可惇風厲俗者。又舉亮拔
秀異之才。可以撥煩理難。矯世抗言者。無繫世
族。必先逸賤。夫戰勝攻取之勢。并兼混一之威。
五伯之事。韓白之功耳。至於制禮作樂。闡揚道
化。甫是士人出筋力之秋也。伏願陛下擇狂夫
之言。

九品疏

九品漢氏本無。班固著漢書。序先往代賢智以
九條。此蓋記鬼錄次第耳。而陳羣依之。以品生

人又魏武拔奇。決於胸臆。收人才不問階次。豈賴九品而後得人。今可令長守爲小大中正。各自品其編戶也。

取士疏

當今士子繁多。畧以萬計。當患官少才多。無地以處。秀才自別是一種仕官。非若漢代取人之例也。假若秀才對五問可稱。孝廉答一策能通。此乃雕蟲小道。何關理功得人。以此求才。徒虛語爾。

牋

薦傅長虞牋

楚聞騏驎不遺能於伯樂，良寶不藏輝於卞和，是以輝光夜射，價連秦趙，飛駟絕影，終朝千里，物尚有之，士亦宜然。

謝賜郭日牋

大恩賜郭日，其器雖小，而禮遇甚弘，昔衛綰錫六劍，珍而不用，楚雖不敏，且受而藏之。

六歲而卒不根於心而於外也

大抵樞機自具其妙小者如蠶其吐絲而

無機而自生

理向許之士而宜也

其以舉次為佳而學於儒經而時時作

其間焉是不學於秋而於一夏不學於十

歲而於一

書

爲石苞與孫皓書

蓋聞見機而作，周易所貴，小不事大，春秋所誅。此乃吉凶之萌兆，榮辱之所由興也。是故許鄭以銜璧全國，曹譚以無禮取滅。載籍旣記，其成敗古今又著，其愚智矣。不復廣引譬類，崇飾浮辭，苟以夸大爲名，更喪忠告之實。今粗論事勢，以相覺悟。昔炎精幽昧，曆數將終，桓靈失德，災釁並興，豺狼抗爪牙之毒，生人陷塗炭之艱。於

是九州絕貫，皇綱解組，四海蕭條，非復漢有。太祖承運，神武應期，征討暴亂，克甯區夏，協建靈符。天命旣集，遂廓洪基，奄有魏域，土則神州，中岳器則九鼎猶存。世載淑美，重光相襲，固知四隩之攸同。天下之壯觀也。公孫淵承舊父兄，世居東裔，擁帶燕胡，憑陵險遠，講武盤桓，不供職貢，內傲帝命，外通南國，乘桴滄流，交疇貨賄，葛越布於朔土，貂馬延乎吳會，自以爲控弦十萬，奔走足用，信能右折燕齊，左振扶桑，陵轢沙漠。

南面稱王也。宣王薄伐，猛銳長驅，師次遼陽，而城池不守，桴鼓一震，而元兇折首，然後遠跡疆場，列郡大荒，收離聚散，咸安其居，民庶悅服，殊俗款附，自茲遂隆。九野清泰，東夷獻其樂器，肅慎貢其楛矢，曠世不羈，應化而至，巍巍蕩蕩，想所具聞。吳之先主，起自荊州，遭時擾攘，播潛江表，劉備震懼，亦逃巴岷，遂依邱陵，積石之固，三江五湖，浩汗無涯，假氣游魂，迄于四紀，二邦合從，東西唱和，互相扇動，距捍中國，自謂三分鼎

足之勢。可與泰山共相終始。相國晉王輔相帝
室。文武桓桓。志厲秋霜。廟勝之算。應變無窮。獨
見之鑒。與衆絕慮。主人欽明。委以萬機。長轡遠
御。鈔略潛授。偏師同心。上下用力。陵威奮伐。衆
入其阻。并敵一向。奪其膽氣。小戰江介。則成都
自潰。曜兵劍閣。而姜維面縛。開北五千。列郡三
十。師不踰時。梁益肅清。使竊號之雄。稽顙絳闕。
球琳重錦。充於府庫。夫韓并魏徙。號滅虞亡。此
皆前鑒之驗。後事之師也。又南中呂興深覩天

命。蟬蛻內向。願爲臣妾。外失輔車唇齒之援。內有毛羽零落之漸。而裴回危國。冀延日月。此猶魏武侯却指河山。以自彊大。殊不知物有興亡。則所美非其地也。方今百僚濟濟。雋乂盈朝。虎臣武將。折衝萬里。國富兵彊。六軍精練。思復翰蜚。飲馬南海。自頃國家整脩器械。脩造舟楫。簡習水戰。伐樹北山。則太行木盡。濬決河洛。則百川通流。樓船萬艘。千里相望。自剗木以來。舟車之用。未有如今之盛者也。驍勇百萬。畜力待時。

役不再舉。今日之謂也。然主上眷眷未便電邁者。以爲愛民治國。道家所尚。崇城遂卑。文王退舍。故先開示大信。喻以存亡。殷勤之旨。往使所究。若能審識安危。自求多福。蹶然改容。祇承往告。追慕南越。嬰齊入侍。北面稱臣。伏聽告策。則世祚江表。永爲藩輔。豐報顯賞。隆於今日矣。若侮慢不式王命。然後謀力雲合。指麾風從。雍益二州。順流而東。青徐戰士。列江而西。荆揚兗豫。爭馳八衝。征東甲卒。虎步秣陵。爾乃皇輿整駕。

六師徐征，羽校燭日，旗旗流星，游龍曜路，歌吹盈耳，士卒奔邁，其會如林，煙塵俱起，震天駭地，渴賞之士，鋒鏑爭先，忽然一旦，身首橫分，宗祀屠覆，取誠萬世，引領南望，良以寒心。夫治膏肓者，必進苦口之藥，決狐疑者，必告逆耳之言，如其迷謬，未知所投，恐俞附見其已困，扁鵲知其無功也，勉思良圖，惟所去就。

與董京書

京與隴西計吏俱至洛陽，被髮而行，道遥吟咏，嘗宿白社中，時乞於市，孫楚數

就社中與京語載以俱歸京
不肯至楚貽之書京答以詩

今堯舜之世胡爲懷道述邦

哀文

和氏外孫道生哀文

嗟爾道生、和氏之寶、玉顏豐下、曜於懷抱。暮春而育、孟冬而夭。二十三旬、奇于五日。方之期頤、百分之一。命之修短、始則有終。誰能長久、與天無窮。錢翁近千、殤子幼冲。俱反無形、冥昧之中。造化多少、豈獨爾躬。

和氏外孫小同哀文

曄曄薺華、朝生夕落。爾命方之、猶爲淺薄。暫有

冥質尋反冥漠。譬彼蜉蝣。不識晦朔。死尚未知。
生亦焉知。爾雖旬月。我未之視。萬物混焉。天地
一指。杪末嬰孩。安足稱誅。大人達觀。同之一揆。

詩

答弘農故吏民

昔我先侯邁德垂化康哉之詠實由良佐惟余
忝辱弗克負荷每歷貴邦仰瞻泰華追慕先軌
感想哀嗟詵詵臣故爰及羣士皓首老成率彼
邑里闡崇高義長幼以齒。

除婦服詩

婦胡母氏也

時邁不停日月電流神爽登遐忽已一周禮制
有叙告除靈邱臨祠感痛中心若抽

征西官屬送於陟陽候作詩

晨風飄岐路。零雨被秋草。傾城遠追送。餞我千里道。三命皆有極。咄嗟安可保。莫大於殤子。彭聃猶爲夭。吉凶如糾纏。憂喜相紛繞。五臣作擾天地爲我鑪。萬物一何小。達人垂大觀。誠此苦不早。乖離卽長衢。惆悵盈懷抱。孰能察其心。鑒之以蒼昊。齊契在今朝。守之與偕老。

太僕座上詩

以下闕文

朝欽厥庸。出尹京畿。廻授太僕。四牡駢駢。綠耳

盈箱翠華蕤、勳齊庭實增國之輝、

祖道詩

仰天惟龍、御地以驥、利有攸往、不期而至、

之馮翊祖道詩

舉翮撫三秦、抗我千里目、念當隔山河、執觴懷
慘毒、

古義

平陽縣二秦詩共千里日念當湖山兩時風

之德既重魚

天並值與山以海何自別主不賦而

孤山

江陰人孫淵叔集卷全

本傳

孫楚字子荆太原中都人也祖資魏驃騎將軍父宏南陽太守楚才藻卓絕爽邁不羣多所陵傲缺鄉曲之譽年四十餘始參鎮東軍事文帝遣符劭孫郁使吳將軍石苞令楚作書遺孫皓劭等至吳不敢爲通楚後遷佐著作郎復參石苞驃騎軍事楚旣負其材氣頗侮易於苞初至長揖曰天子命我參卿軍事因此而嫌隙遂構苞奏楚與吳人孫世山共訕毀時政楚亦抗表

自理紛紜經年事未判又與鄉人郭奕忿爭武帝雖不顯明其罪然以少賤受責遂湮廢積年初參軍不敬府主楚旣輕苞遂制施敬自楚始也征西將軍扶風王駿與楚舊好起爲參軍轉梁令遷衛將軍司馬時龍見武庫井中羣臣將上賀楚言龍蟠坎井下有伏才請起淹滯惠帝初爲馮翊太守太康三年卒初楚與同郡王濟友善濟爲本州大中正訪問銓邑人品狀至楚濟曰此人非卿所能目吾自爲之乃狀楚曰天

才英博。亮拔不羣。楚少時欲隱居。謂濟曰。當欲枕石漱流。誤云漱石枕流。濟曰。流非可枕。石非可漱。楚曰。所以枕流。欲洗其耳。所以漱石。欲厲其齒。楚少所推服。惟雅敬濟。初楚除婦服。作詩以示濟。濟曰。未知文生於情。情生於文。覽之悽然。增伉儷之重。三子衆。洵。纂。衆及洵俱未仕而早終。惟纂子統。綽。竝知名。

史臣曰。孫楚體英綢之姿。超然出類。見知武子。誠無媿色。覽其貽皓之書。諒曩代之佳筆也。而

負才誕傲。蔑苞忿奕。違遜讓之道。肆陵憤之氣。
十年沉廢。蓋自取矣。



